

**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA**

Broj:02-011-191/'00
Sarajevo, 31.07.2000.god.

Z A P I S N I K

**21. sjednice Doma naroda Parlamentarne skupštine Bosne i Hercegovine
održane 31.07. 2000. godine**

Sjednica je počela u 12,10 sati.

Sjednicom je predsjedavao Drago Ljubičić, predsjedavajući Doma naroda Parlamentarne skupštine Bosne i Hercegovine.

Na sjednici Doma bilo je 13 delegata.

Svoj izostanak opravdali su Momir Malić i Momir Tošić.

Na sjednici su bili i: Ambasador Dieter Woltman; Mirsad Kurtović, ministar za vanjsku trgovinu i ekonomske odnose; Milovan Blagojević, zamjenik ministra za evropske integracije; Kasim Trnka, Nikola Špirić, Ibrahim Đedović i Sejfudin Tokić u ime predlagača zakona.

Nakon što je utvrdio da ima kvorum, predsjedavajući je predložio sljedeći

DNEVNI RED

1. Usvajanje zapisnika 19. i 20. sjednice Doma naroda
2. Prijedlog zakona o popunjavanju upražnjenog mjesta člana Predsjedništva – predlagač Predsjedništvo BiH;
3. Prijedlog zakona o finansiranju političkih stranaka u BiH - predlagači poslanici Nikola Špirić i Ibrahim Đedović;
4. Nacrt zakona o slobodi informiranja u BiH – predlagači poslanici Sejfudin Tokić i Ivo Lozančić
5. Davanje saglasnosti za ratifikaciju Sporazuma između BiH i Narodne Republike Kine o trgovini i ekonomskoj saradnji i
6. Odgovori na delegatska pitanja, delegatska pitanja i inicijative

U raspravi o dnevnom redu sudjelovao je Mugdim Herceg predlažući da se Prijedlog zakona o popunjavanju upražnjenog mjesta člana Predsjedništva izostavi iz dnevnog reda.

S obzirom na to da prijedlog Mugdim Hercega nije prihvaćen jer su četiri delegata glasala za, osam je bilo protiv a jedan uzdržan, glasalo se o dnevnom redu koji je jednoglasno usvojen.

AD. 1. Usvajanje zapisnika 19. i 20. sjednice Doma naroda

U raspravi o zapisnicima 19. i 20. sjednice niko nije sudjelovao. Zapisnici 19. i 20. sjednice usvojeni su jednoglasno.

AD. 2. Prijedlog zakona o popunjavanju upražnjenog mjesta člana Predsjedništva – predlagač Predsjedništvo BiH

U raspravi o ovoj tački dnevnog reda sudjelovali su: Dieter Woltman, Ristić Ristan, Vinko Zorić, Izet Žigić, Kasim Trnka i Avdo Čampara.

Delegati Izet Žigić i Mugdim Herceg su predložili da se glasanje o Prijedlogu zakona odgodi za jednu od narednih sjednica Doma naroda. Ovaj prijedlog je odbijen s obzirom da su za njega glasala tri delegata, devet je bilo protiv a jedan uzdržan.

Prijedlog zakona o popunjavanju upražnjenog mjesta člana Predsjedništva je usvojen u istovjetnom tekstu kao na Predstavničkom domu Parlamentarne skupštine BiH sa 10 glasova za, dva glasa protiv i jednim uzdržanim glasom.

AD. 3. Prijedlog zakona o finansiranju političkih stranaka u BiH - predlagači poslanici Nikola Špirić i Ibrahim Đedović

U raspravi o ovoj tački dnevnog reda sudjelovali su: Nikola Špirić i Đoko Pajić.

Nakon rasprave glasalo se o prijedlogu zakona.

Prijedlog zakona o finansiranju političkih stranaka u BiH je, sa 12 glasova za i jednim glasom protiv, usvojen u istovjetnom tekstu kao na Predstavničkom domu Parlamentarne skupštine BiH.

AD. 4. Nacrt zakona o slobodi informiranja u BiH – predlagači poslanici Sejfudin Tokić i Ivo Lozančić

U raspravi o ovoj tački dnevnog reda sudjelovao je Sejfudin Tokić.

Nakon izlaganja Sejfudina Tokića jednoglasno je usvojen sljedeći zaključak: Usvaja se Nacrt zakona o slobodi informiranja u BiH. Nacrt zakona može poslužiti kao osnova za izradu prijedloga zakona, uz obavezu predlagača da prilikom izrade Prijedloga zakona uzme u obzir primjedbe i sugestije iznesene u raspravi.

AD. 5. Davanje saglasnosti za ratifikaciju Sporazuma između BiH i Narodne Republike Kine o trgovini i ekonomskoj saradnji

U raspravi o ovoj tački dnevnog reda nije niko sudjelovao.

Jednoglasno je data saglasnost za ratifikaciju Sporazuma između BiH i Narodne Republike Kine o trgovini i ekonomskoj saradnji

AD. 6. Odgovori na delegatska pitanja, delegatska pitanja i inicijative

Delegat Vinko Zorić nije zadovoljan odgovorom na pitanje postavljeno na 19. sjednici, te traži da mu se ponovo odgovori na pitanje: Ko su članovi Komisije za vanjska pitanja Parlamenta BiH? Vinko Zorić traži odgovor s obzirom da je iz pisma Zdravka Tomca vidljivo da je Parlamentarna delegacija BiH, a to znači predstavnici oba doma Parlamentarne skupštine BiH trebalo da odu u posjetu Saboru Republike Hrvatske.

Delegat Vladimir Šoljić nije zadovoljan odgovorom na zahtjev koji je postavio na 10. sjednici, a koji glasi: Da se zahtjeva od Vijeća ministara da dostavi Domu naroda tačan spisak stranih državljana koji su postali državljani BiH od početka 1992. do novembra 1999. Vladimir Šoljić raži da mu se da potpun odgovor s obzirom na to da lica koja su dobila državljanstvo BiH imaju imena i prezimena.

Delegat Vladimir Šoljić je postavio pitanje Ministarstvu za ljudska prava i izbjeglice: Zbog čega se, po opštinama, ne napravi pregled kakva je bila nacionalna struktura stanovništva u BiH 1991. a kakva je 1999. godine i zašto se taj pregled ne dostavi Parlamentarnoj skupštini BiH?

Delegat Vladimir Šoljić je dao i inicijativu da se održi zajednički sastanak kolegija oba doma Parlamentarne skupštine BiH sa svim članovima Vijeća ministara, kako bi se do kraja mandata ovog saziva Parlamentarne skupštine BiH, učinio maksimum napora u pogledu donošenja zakona. Vladimir Šoljić je naglasio da u Domu naroda nije čekao niti jedan materijal, nego je odmah uvrštavan u dnevni red. Istovremeno je predložio da se o ovoj inicijativi obavjesti i kancelarija OHR.

Delegat Đoko Pajić je tražio da mu OHR i Privremena izborna komisija da odgovor na sljedeće pitanje: Čime su se OHR i Privremena izborna komisija rukovodili kada su dvjema strankama iz Republike Srpske, a među njima i Srpskoj radikalnoj stranci, zabranili izlazak na izbore?

Delegat Avdo Čampara je dao inicijativu da se sugeriše Parlamentu Federacije BiH i Narodnoj skupštini Republike Srpske da njihove ustavne komisije užurbano rade na usaglašavanju entitetskih ustava sa Ustavom BiH, a u vezi sa odlukom Ustavnog suda BiH u pogledu konstitutivnosti naroda.

Delegat Mugdim Herceg je dao dvije inicijative:

1. da Ministarstvo vanjskih poslova BiH pokrene proceduru za zaključivanje bilateralnog ugovora sa Švedskom u pogledu međusobnog priznavanja penzionog staža za građane BiH i Švedske;
2. da Kolegij Doma naroda, u skladu sa usvojenim Poslovníkom definira novu strukturu i sastav komisija Doma naroda, da se na jednoj od sljedećih sjednica verificira mandat članovima komisija, te da Doma naroda nastavi dalji rad u skladu sa odredbama usvojenog Poslovníka.

Delegat Izet Žigić postavio je sljedeće pitanje Vijeću ministara BiH:

Da li se Vijeće ministra sastajalo i da li su se resorna ministarstva uključila u rješavanje aktuelnog problema, vezano za događaj u Janji?

Predsjedavajući Drago Ljubičić je zatražio da se delegatima dostave zaključci sa zajedničke sjednice kolegija oba doma Parlamentarne skupštine BiH kako bi bili upoznati sa dogovorom u pogledu usaglašavanja stavova oko sastava delegacija koje predstavljaju Parlamentarnu skupštinu BiH.

Sjednica je završena u 14.50 sati.

Magnetofonski snimak čini sastavni dio Zapisnika.

**PREDSJEDAVAJUĆI
DOMA NARODA
Drago Ljubičić**